



## In Ler Pour Eleksyon Prezidan

**LDS** in lans lapel pour nouvo eleksyon prezidansyel. Nou demann tou Seselwa pour ralye pour konplet sa sanzman ki nou pei i bezwen.

Dirizan Lopoziyon, Hon. Wavel Ramkalawan, pou met sa size devan Msye Danny Faure avek en mosyon dan Lasanble Nasyonal semenn prosenn.

Sesel i bezwen bouze. Nou bezwen rezourd bann problem ki nou fer fas avek e anmenn nou pei dan en nouvo letap bonn gouvrenans.

Pour sa arive, nou bezwen en Governman ekzekitiv ki fonksyon byen, ki fer desizyon a-tan e pran aksyon san tarde.

Aprè 2 zan son mazorite dan Lasanble Nasyonal, LDS in montre lepep Seselwa dan ki direksyon nou bezwen ale. Lamazorite Seselwa ozordi i siport sa misyon ki LDS in met devan nou.

Be Lekzekitiv dirize par Msye Faure koman Prezidan in bloke. Zot

***Msye Faure pa'n zanmen debout pour okenn eleksyon e pa'n zanmen ganny okenn manda direk avek lepep.***

dan letarzi. Zot in pri dan bann leta despri lepase ki anpes zot azir koman en gouvrenman modern e efektiv.

An plis ki sa, zot konfize antre zot menm lekel ki pou diriz zot. Msye

**Mosyon Hon. Wavel Ramkalawan – Leader of the Opposition**

*Lasanble Nasyonal i eksprim:*

**a.** *son gran dezapwentman dan lafason ki Lekzekitiv pe diriz pei;*

**b.** *son konsern profon ki napa aksyon efektiv dan ladministrasyon pei;*

**c.** *son lenkyetid ki striktir leta Sesel pe deteryore;*

*e alor i demande ki Msye Danny Faure i pran en aksyon onorab e demisyonnen imedyatman koman Prezidan dan lentere nasyonal, pou permet lepep Seselwa swazir son prosen gouvrenman.*

Faure li-menm i bezwen pran lord an deor State House.

Msye Faure in ensiste ki i bezwen konplet son manda. Be son manda i zis en laranzman konstitisyonel ki'n ganny met dekote ozordi. An 2015, sete Msye James Michel ki ti ganny elekte Prezidan. Msye Faure pa ti ni menm lo papye vote. In erit biro Prezidan ler Msye Michel ti demisyonnen. Sa sistenm pas baton, Msye Faure li-menm in trouve ki i pa demokratik e in dakor ki i ganny aboli dan nou Konstitisyon.

An efe, i remarkab ki Msye Faure pa'n zanmen debout pour okenn eleksyon e pa'n zanmen ganny okenn manda direk avek lepep.

In ler pour Msye Faure pran responsabilite sa desizyon e demisyonnen pour lepep Seselwa ganny nouvo eleksyon prezidansyel.

Prezan, nou demann lepep Seselwa pour montre son sipor pour sa lapel. Menm si vot lo sa size dan Lasanble pa obligatwar, en Prezidan i devre pran kont lavolonte lepep e fer en desizyon dapre sa ki lepep i dir.

# Gran Rali LDS

**Dimans 23 Septanm - Pointe Larue - 3er**

**VIN DONN OU SIPOR POU KONPLET SANZMAN**

## *Linyon I Fer Lafors*

# Seselwa i dir: Disourd Lasanble si ou fye!

Seselwa in reazir imedyatman lo menas Msye Danny Faure, fer dan son konferans lapres, pour disourd Lasanble Nasyonal.

Repons piblik in kler :**"Disourd si ou le, me aksepte lakonsekans"**.

An efe, Danny in perdi son 'cool' e i pa'n byen kalkile avan i fer sa menas.

i'n fer sa an repons en lapel par LDS ki i demisyonnen e permet nouvo eleksyon prezidansyel. Me si i disourd Lasanble, LDS pou ganny en pli gran mazorite, e apre ki i pou fer? Si i annan okenn loner, i pou bezwen anval son parol e demisyonnen a son tour.

Ozordi, se pa Lasanble ki problem e ki pe met retar pei. Se ladministrasyon Msye Faure. Alor, problem pa pou rezourd avek disourd Lasanble. Si i fer sa pou sey fer LDS per, i pe gat son letan. Nou, nou pare pou sorti nenport ler ki Lepep Seselwa i dir nou. Sa se en prensip lademokrasi ki li i pa pe swiv.

**Nou pa per eleksyon. Eski Msye Faure i kapab dir parey?**

## MNA Au Cap dan kanpanny netway lans

Onorab Steven Pillay i enn bann Manm Lasanble ki'n aktiv dan son distrik pandan wikenn. In pran par dan en kanpanny netway lans Pointe Au Sel. Sa i en lans tre popiler. Au Cap i kontan pour akey zot, me i osi fer lapel pou zot pa kit salte deryer ler zot ale e ede gard landrwa prop. Sa laktivite ti par dan kanpanny netwayaz lemonn.

## Mont Buxton i ofer disko

MNA pour Mont Buxton i enn ki souvan pe organiz keksoz dan son distrik e wikenn pase i ti anmenn en group son zabitan disko ki ti fer Club 55, kot kompleks STC lo nouvo por. Sa ti Dimans apremidi, en letan ideal pour en rankont lanmizman ki anmenn dimoun ansanm.

## Konsej Rezyonal i komans rankont ek piblik

**B**ann Konsej Rezyonal ki'n ganny formen resaman in komans zot travay e pe fer zot mye pour ranpli zot langzman anver zot kominote.

Tou bann Konsej in aprejan apwent zot tyermenn e rankontre avek bann Administrater Distrik ki dan zot rezyon. Zot in komans get travay ki bezwen fer, sirtou bann proze ki deza ekziste e ki'n pran retar.

Lenplemantasyon bann proze i reste responsabilite Ladministrasyon Distrik me Konsej i annan rol desid lo priorite e sirvey travay ki bezwen ganny fer.

Serten konsej in komans fer rankont avek zabitan bann distrik. Rezyon Santral ! ti fer enn sa bann rankont se-

menn pase, dan distrik St. Louis. En bon nonm dimoun ti asiste e bi prensipal sete pou enform zabitan lo rol Konsej e ankouraz zot pour partisipe. Konsej i bezwen rod partisipasyon zabitan lo serten komite ki kapab regard diferan size ki konsern lakominote.

I annan lezot Konsej ki pe plito al lo teren pour zwenn bann rezidan kot zot ete e ganny zot lopinyon lo sa ki neseseur pour distrik.

An menm tan, bann Konsej pe sey rod en fason kooperasyon avek bann DA pou met lentere distrik premye.

A lavenir, bann konsej i ekspekte ganny pli enplike dan travay pour zot distrik.

## Kontrakter ki ganny peye me pa fer louvraz !

**K**ontrakter pe ganny en move repitasyon dan Sesel akoz en bann pa pey zot travayer etranze. Me i annan lot problem ki afekte bokou dimoun e sa se ler kontrakter konstriksyon i ganny peye me pa fini louvraz.

Sa pratik i arive souvan akoz polisi bann labank pou donn larzan ki dimoun in prete pou fer lakaz direkteman dan lanmen kontrakter olye sa dimoun ki'n pran loan.

Sa in vin en problem enorm kot plizyer dimoun l vwar zot pe bezwen tay deryer kontrakter e menm anmenn zot ankour pour ki sa kontrakter l kapab fini zot lakaz. Rezon deryer sa problem se ki l annan kontrakter ki dwa plizyer landrwa. Alors enn fwa zot ganny sa larzan ek labank, olye al rod materyo pou konstri sa lakaz, zot servi sa larzan pou pey

zot bann det.

Apre zot bezwen esper larzan en lot proze pou komans travay lo lakaz sa famir ki pe espere tou sa letan. Menm apre sa, larzan l kapab fini ankour e travay l arête.

Problemm pli grav ladan se ki labank pa demann kontrakter pou rann sa larzan me plito sa Seselwa ki'n demann prete. Zot pe bezwen rann labank menm si zot lakaz pankor fini.

Ziska kan ki nou bann Seselwa, ki travay zour e nwit pou fer de pti bout zwenn pou kapab aret ganny bann problem parey? Olye antre dan ou prop lakaz dan 6 mwan, ou vwar ou pe plito tay deryer kontrakter e rann larzan labank menm si ou proze lakaz pankor fini.

Fodre ki aksyon i ganny pran avek sa bann kontrakter malonet.

## Felisitasyon Hon. Esparon pour Lazournen Spor

**Manm elekte pour Glacis, Hon. Regina Esparon, in organiz en lazournen spor dan son distrik Dimans pase.**

Sa levennman in en gran sikse avek partisipasyon plis ki en santenn dimoun dan bann konpetisyon e en gran lafoul spektater.

Bann konpetisyon ti enkli spor regilye parey futbol ek volibol, me osi bann pli enformel parey bos lakord e domino. In annan en keksoz pour tou ki'n anvi partisipe.

Hon. Esparon in montre ki i osi annan en bon lekip aktivis pour li kapab met tou sa lorga-

nizasyon an plas. Bon relasyon avek serten departman gouvrenman parey NSC in osi port fri.

Son bon relasyon in osi permet li ganny kontribisyon en biznes dan son distrik, Vimal Trading, ki'n permet li realiz sa levennman.

An efe, in annan en kantite resours e bonn volonte ki'n ganny met a son dispozisyon e sa i temwanyaz lafason ki i travay.

Levennman in montre ki Hon. Esparon i en madanm ki devoue pour son distrik e ki pa per louvraz. I pare pour met tou zefor posib pour fer keksoz pour son kominote.